

【幸福个味緒】李淑娟原作

幸福係麼个味緒？有人會講，係放學時節轉到屋下，對灶下飄散出來个燜豬腳香味；有人會講，係阿爸下班過後圓身頂臭汗臊个味緒；也有人講，係暗晡頭屋背該頭桂花樹淡淡个花香。味緒，看毋著、聽毋著乜摸毋著，盡趣妙个係，佢總係做得同偲兜个回憶圓共下，食著、鼻著共樣味緒个時節，回憶乜會跔等像戲齣樣仔又再放送出來。

吾爸在偲讀國中三年生个時節過身咧，因為發現肝癌个時節忒慢，既經第三期。佢辭忒頭路拖等著病个身體做咧年過个治療，攞吾姆同偲兩兄弟就轉長山賣鴨卵乜。阿爸分偲印象最深个毋係長壽菸个味緒，毋係醫院吊大笏射个藥味，顛倒係厥手路菜「番茄<sup>1</sup>炒卵」个好味緒。

阿爸个「番茄炒卵」定著愛特別用臨暗頭市場項伸个、有靠傷个、嫋嫋个番茄，因為該下仔頭家愛收攤乜，會半買半相送。

佢當沙鼻講：「雖然這毋係星級个材料，毋過有阿爸五星級个好手藝啊！」斷真哦！這項菜上桌个時節，紅啾油光油光个番茄，合等該綿綿嫩嫩又黃蠟个雞卵，還盲入嘴就先吞口涎水哩。該香香又酸酸甜甜个味緒，單淨攪味就做得划忒兩碗白飯，這幸福个味緒一直囿在偲个記憶裡背毋會散忒。

阿爸做化療該段時間，阿姆天言光愛先去送牛乳，再趕去工地做小工，無時間煮飯。偲同老弟輒常食白飯傍醬菜、豆腐乳、魚仔罐頭，係無就泡麵加一粒雞卵。阿爸愁慮偲兜營養毋罇，刻耐仔忍等身體个毋鬆爽煮菜分偲兜食。每擺酸酸甜甜个味緒食落肚，偲个心乜跔等酸酸甜甜，甜个係阿爸惜子个心意，酸个係，毋知還做得再食著幾多擺這幸福个味緒？

對偲來講，幸福就係「番茄炒卵」該酸酸甜甜个味緒，佢總會帶出偲最深、最甜个回憶，分偲看著阿爸黃蠟个面容項掛等滿足个笑容。這下偲又乜最驚食著這項菜，因為偲驚食忒多別家个「番茄炒卵」，會害偲添放忒記憶當中阿爸留分偲个味緒，該阿爸惜子个味緒，偲同阿爸共下个幸福味緒。

---

1 番茄：音 toˋ ma doˋ；番茄（英文 tomato），屬茄科，又名柑仔蜜、西紅柿等。